

**■ TRIBUNA POLITICA**

# La nova planisaziun dals ospitals garantescha in provediment efficient

DA CHRISTIAN RATHGEB  
CUSSEGLIER GUVERNATIV

La planisaziun dals ospitals dal Grischun vegn fixada da nov sin il stgalim d'ina lescha, e quai tenor las prescripziuns federalas orientadas a la prestaziun. Il cussegl grond ha approvà la missiva correspundenta da la regenza.

Il chantun Grischun po ademplir ad ura las novas disposiziuns federalas concernent ina planisaziun dals ospitals che s'orientescha a la prestaziun e concernent in provediment medicinal da la populaziun che correspunda als bassegns. Per quest intent ha il cussegl grond concludì la sessiun d'avust ina revisiun parziala correspundenta da la lescha per promover la tgira da personas malsaunas e l'assistenza da personas attempadas e da personas che basegnan tgira (lescha per promover la tgira da personas malsaunas).

Cun la planisaziun dals ospitals eruescha la regenza periodicamain il bassegn da prestaziuns e la purschida necessaria per il provediment medicinal da la populaziun. Sin basa da la planisaziun dals ospitals relascha la regenza ina glista dals ospitals che cuntogna ils furniturs da prestaziuns, pia ils ospitals e las clinics, sco er lur incarica da prestaziun.

Fin uss èn la planisaziun dals ospitals e la glista



dals ospitals vegnidas fatgas sin basa dals letgs a disposiziun. Tenor il dretg federal ston da nov vegnir resguardadas la rentabilitad e la qualitad da las prestaziuns furnidas sco er la cuntanschibladad da las prestaziuns per giuditgar e per tscherner la purschida che duai vegnir garantida sin la glista dals ospitals. Perquai vegnan la planisaziun dals ospitals e la glista dals ospitals fatgas da nov sin basa da la prestaziun.

Per promover lur competitivitat pon – tenor la nova lescha per promover la tgira da personas malsaunas – dentant er vegnir surdadas als ospitals grischuns incaricas da prestaziun che surpassan il bassegn. Plinavant pon ils ospitals en il chantun vegnir obligads da furnir tschertas prestaziuns, sche quai è necessari per il provediment da la sanadad. La lescha prevesa sancziuns, en cas che las disposiziuns na vegnan betg observadas.

Ultra dals criteris da la rentabilitad e da la qualitad fa la lescha ulteriuras pretensiuns envers ils ospitals. Quellas èn la cundiziun per survegnir ina incarica da prestaziun. Uschia po la surdada d'incaricas da prestaziun per exempel vegnir fatga dependenta da dumbers minimals da cas, sche lur influenzas sin la qualitad dals resultats èn vegnidas renouschidas scientificamain.

Ils ospitals ch'existan gia e ch'èn sa cumprovads en il Grischun cun lur purschida decentrala existenta dal provediment medical da basa vegnan ad esser necessaris er en l'avvegnir per proveder la populaziun. Serradas d'ospitals n'èn planisadas naginas! Quai mo gia per ch'il provediment en cas d'urgenza possia vegnir garantì a temp. Prestaziuns raras u complexas, che pretendan ina infrastruttura fitg chara ubain enconuschientschas ed abilitads spezializadas, vegnan dentant concentradas tras la nova legislaziun. Il resultat duai la finala esser ina planisaziun ed ina glista dals ospitals che tegnan quint da las pazientas e dals pazients e che correspundan a las prescripziuns da dretg federal concernent la rentabilitad e la qualitad, che mettan a disposiziun a la populaziun dal chantun ina purschida adequata e che pussibiliteschan ina concurrenza reglada tranter ils purschiders.